

Anansi nanga Kaiman

So mi e go ferteri wan pikin tori fu Anansi nanga Kaiman. Anansi na wan man di abi someni triki. Anansi prakseri fa ai go kisi den tra meti fu nyan. Anansi waka na ini a busipasi. Now Anansi si wan fisi-olo, dan a prakseri taki ai go kisi tu fisi drape. Ma di Anansi saka go fu teki a fisi ini a olo, dan a firi wan sani ori en.

Anansi taki: "San! San e ori mi?"

Dan a sani piki en taki: "Mi na Fringi."

Anansi taki: "We, dan i fringi mi, no."

Dan a sani fringi Anansi bun fara. Dan di Anansi opo, a prakseri taki: "Ai, disi bun. Dan now mi e go abi stimofu ala dei. Mi no abi fu go firi fisi moro."

Di Anansi opo, a suku wantu pisi tiki. Dan a beri a tiki leti pe a ben fadon. Di Anansi e gwe, now a miti nanga Konkoni. Dan a kari Konkoni taki: "Ee, mat' Konkoni, kon yere. Kon yere, mat' Konkoni. Pe yu e go? Pe yu e go?"

Konkoni taki: "Aa, mi waka waka heri dei. Mi no feni noti. Mi e go na oso."

Dan Anansi taigi Konkoni taki: "Ee, man, kon go fisi."

Dan Konkoni taki: "Fisi? Pe?"

Anansi taki: "Kon go man, mi e go sori yu pe."

Di den waka na a busikanti, dan den doro pe a olo de. Ma Anansi sabi san ben miti en kba. Dus a no go na dati sei, ma a seni Konkoni go. Ma di Konkoni go, Anansi taki: "Man, dati sei i mu firi."

Dan Konkoni bigin firi. A ten di a bigin, a firi wan anu ori en. Dan Konkoni bari gi Anansi: "Eee, eee, mat' Anansi, wan sani ori mi!"

Anansi taki: "San! Wan sani ori yu?" Dan Anansi taigi Konkoni taki: "Bari gi en, aksi en san e ori yu?"

Dan di Konkoni taki: "San ori mi?", a sani piki: "A Fringi."

Dan Konkoni bari gi Anansi taki: "A taki na Fringi."

Dan Anansi taki: "Taigi en meki a fringi yu dan." Dan a fringi Konkoni. Dan Konkoni fadon tapu den mofu fu den pispisi tiki, den tiki di Anansi ben poti drape. Dan Konkoni kon dede. Dan Anansi dyompo, a gwe go teki Konkoni. Dan a gwe ini en oso. Ala dei Anansi e waka e suku den tra meti e tyari go na a fisi-olo. So Anansi e feni en nyanyan.

Ma dan now wan dei Anansi e gwe, a no si no wan meti na pasi. Dan a si mati Kaiman. A taki: "Eee, Kaiman, pe yu e go? Pe yu e go?"

Kaiman taki: "We, mi e waka waka lontu, luku san de fu nyan."

Dan Anansi taigi en: "Ee mati, kon. Kon un go fisi."

Di Kaiman nanga Anansi gwe, den doro a busikanti. Dan Anansi seni Kaiman taki: "Go fisi na dati sei."

Dan Kaiman piki en taki: "No, yu go na dati sei."

Anansi taki: "No, mi e tan na dati sei, man. Go na dati sei."

Kaiman prakseri moi koni, dan a kari Anansi taki: "Sori mi sortu sei." Dan di Anansi e sori Kaiman a presi, dan Kaiman sutu a anu fu Anansi gwe na ini a olo. Bika Kaiman sabi san Anansi ben wani du nanga en. Kaiman na wan man di e tan na ini watra, dus a sabi ala den fisi-olo.

Dan Anansi bari gi Kaiman taki: "Wan sani ori mi, man." Anansi e seki en anu nomo.

Kaiman taki: "I sabi san i mu bari, tog."

Anansi taki: "San mi mu bari?"

Kaiman taki: "A fringi."

Anansi taki: "Wakti, wakti. Lon go na bakasei drape, go puru den pèn gi mi. Go now, go now!"

Hm, Kaiman e lafu. Kaiman taki: "San na dati? Pe den pèn de?"

Anansi taki: "Waka moro fara. Waka moro fara."

Di Kaiman doro, a si den pèn. Dan a bari gi Anansi: "Ai, mi puru den."

Anansi taki: "I puru den?"

A taki: "Ai, mi puru den." Ma Kaiman moro koni, bika a no ben puru den pèn.

Anansi bari taki: "A fringi." Dan a fringi en tu. Dan di Anansi fadon tapu a pèn, so Anansi kon dede.

Dan Kaiman go now, a ferteri ala den meti san ben psa, fa Anansi ben kiri den trawan. Na so a tori fu Anansi nanga Kaiman ben psa.